

# PHÂR A DAM TA

RAWNGBÂWLNA: Pathianin rawngbâwl dân min zirtîr thîn.

CHÂNGVAWN: “Thil thâte ... ti tûra siam kan ni sî a,” (Efesi 2:10, NIV).

**Chhiâr Tûr:** 2 Lalte 5:9-14; *Zâwlneite leh Lalte*, (2<sup>nd</sup> Edition, 2014), p. 214-216..

**Zirlai Tum:** Naupangte Chuan:

- Pathianin inţanpui tawn tûrin min siam tih **hria a**,
- A tûlna hun leh hmun apianga ţanpui zêl duhna **rîlrû pûin**,
- Mi dangte tân thil thâ an **tihsak** zêl ang.

**Thuchah:** Mi dangte tâna thil thâ tihsaknain Pathian rawng kan bâwl thîn.

*Mahni duh vâng rêngin tû tân emaw thil thâ eng emaw tak in tihsak tawh ngai em? Naamana chu mî tûten emaw thil thâ an tihsak a. A chanchin chu hetiang hi a ni.....*

**H**OTUPA Naamana chu phûr tak tlêma hlâuthâwn deuh nei chung sîn a awm a. Tûnah chuan zâwlnei Elishâ hnên lam an pan mêk a. A phâr natna vei chu a lo tihdamsak theih beiseina avângin a phûr a. A lo tihdamsak thei lo mai ang em tih ngaihtuahna avângin a hlâuthâwng deuh bawk a ni.

Naamana chuan rangkachak leh tangkaraw tlang bâkah silhfên thar man to tak tak kha a keng bawk a. Chûng chu a tidamtû hnêna lâwmman atâna a la pêk atân a ni.



A tâwpah chuan Suria sipai hotupa Naamana leh a chhiahhlawhte chuan zâwlnei chênna hmun chu an va thleng ta hlawl mai a. Ani chu a sakawrtawilîr aţangin a chhuk a. Zâwlnei Elishâ chhiahhlawh chuan a lo dawngsawng a. A pû hnênah chuan Sipai hotu Naamana chu a lo thleng ta tih a hrih a.

Tuâlâh chuan Naamana chu nghâkhlel takin a lo awm a. Minit rei vak lo hnûah chuan zâwlnei chhiahhlawh chu lo kîr lehin, thuchah arawn hrih a. Chû chu hei hi a ni: “Zâwlnei Elisha chuan ‘Jordan Luiah wavi sarîh inhnim pil sela, tichuan a phâr natna chu a dam mai ang,’ a ti” tiin a hrih a.

Thinrimin Hotupa Naamana hmai chu a sen tawn tawn a! *Zâwlnei chuan biak pawh min be lo va*, tiin a ngaihtuah nauh nauh a. Chû thuchah lo thleng pawh chu a ngaithei lo hlê mai a. Thinrim tak chungin a sakawr-tawlailîrah chuan a chuâng kâi leh nghâl a. Thinrim tak chungin, “Hâw daih ang u!” a ti vêl a.

A chhiahhlawhte chu an inmelh kuâl deuh hâ hâ hlawm a. Naamana hnênah chuan, “Engati nge kan hâw mai ang?” tiin an zâwt ta phawng mai a.

Ani chuan, “Jordan Lui tui nu phûta inchiah hi ka duh hlei nê! Inbual ngai ka nih hrim hrimte chuan kan ramah lui tui fîm leh thianghlim zâwk kan nei reng a lâwm,” a ti a.

A chhiahhlawhte chuan, “Lo ngâwi lawk teh. Zâwlnei khân thil harsa zâwk ti tûrin ti ta che sela, tih i tum tho dâwn lâwm ni? Engah nge thil awlsam zâwkte chu i’n tih mai loh ang ni?” an ti a.

Hotupa Naamana chu a ding a, a’n ngaihtuah vung vung a. A rilrû tê tê chuan ‘*An tidik chiah mai! Helai hmun thleng thlengin kan lo kal tawh a. Zâwlnei sawi ang chuan ka ti mai teh ang*’ a ti ta a. A hote hnênah chuan, “Aw le, Jordan Lui lam chu i pan ang u,” a ti a.

Hmanhmawh takin lui lam chu an pan tlâng ta a. Hotupa Naamana chuan a pheikhawk leh silhfênte a hlîp a. Lungâwi chiah lo hmêlpu chungin Jordan Lui tui nu deuh phût chu a’n melh a; mahse, tui chu a zu dâi ta ngê ngê a.

Naamana chu vawi khat a han inhnim pil a, a natna chu a la ngai reng. Vawi hnih— a la danglam chuâng lo! Vawi thum—eng mah la ang chuang lo. Vawi lî—a vun a la vâ reng tho. Vawi ngâ—danglam lo. Vawi ruk—la ngai reng. Vawi sarîh—Â! Bo tâ! Phâr natna a bo ta daih mai! Zâwlnei Elishan a lo sawi tâk ang chiah khân Pathianin Naamana chu a tidam ta a ni.

Naamana chu phûr takin tui aţangin a lo zuang chhuak a! Mahni a han inen a. Ni e! A lo dam tak tak! Phâr natna vânga a vuna pân awmte kha a bo ta vek mai! Elishâ hnêna lâwmthû sawi tûrin hmanhmawh takin an kal leh ta thung a. A chhûngte hnêna a dam dân hrilh hlân pawh a nghâkhlel ta hlê mai a ni.

Hotupa Naamana chunga thil t̄hâ tiin Sal Hmeichhe Naupang leh Zâwlnei Elisha-te khân Pathian rawng an bâwl a. Hmeichhe Naupang chuan a Pathian chanchin a hrilh a, Zâwlnei Elisha’n Pathianin a tihdam dân tûr tak a lo hrilh vê thung a. Pathian chuan mi dangte chunga thil t̄ha tihsak t̄heuh tûrin min duh a ni.

## TÌH TÛR LEH SAWI TÛR

**Sabbath Chàwnhû:** Tûn kâr nî tinin, zirlai hi chhiar ho vin, chângvawn ennawn nân heta zaizir hi in ti t̄hîn dâwn nia:

**Thil t̄hâte...** Kut hûm chunga kut hûm chherchhuan



**ti tûra** . . . . thil siama hmet vêl ni âwma kut sam vêl



siam kan ni sî . . . mahni leh mi dangte kawh kual.



Efesi 2:10 . . . . Kut phah pahnih thlawp a, kâu leh.



**Sunday:** Chhiar ho tûr: *2 Lalte 5:9-14*. **Inzawh tûr:** Jordan Luia wawi sarih a inhnim hnû khân eng rilrû nge Naamna khân pûa in rin? In fâte chu maimitchhîntîr ula, chutah an kut khawihsak teh u. **Inzawh tûr:** Phâr natna vei lo ni ta ulang, indeh chu in hre thei ang em? Natna hre thei ta lo ulang, engtin nge ni ang? A theih chuan lui lamah kal ula. **Inzawh tûr:** Tui chu a fîm nge a nû? Jordan Lui tui kha engang nge ni? (a nû) Nangnî tui nûa inchiah in duh ang em? Naamana pawh khân tui nûa inhnim a duh bîk lo va, mahse thuâwih takin a inhnim a, a lo dam ta a ni. Hla sak tûr: “Dip, Dip, Dip in the River” (*Little Voices Praise Him*, no. 56).



**Thàwhṭannî:** Naupangin tuiah chi-al tlêm thehin, chawk se, eng thil nge lo thleng lo thlîr teh u. Pathianin Naamana a tihdam dân chungchâng in hrilh dâwn nia.



**Thàwhlehnî:** Nautê in bual laiin, tuiah wawi sarih hnimin, in chhiar zêl dâwn nia. A danglamna an hre thei em le? Naamana khân a vunin tui a deh khân engtin nge a awm ang tih hrilh ang che u.

**Nîlâinî:** Naamana anga hman atân naute lem la ula. Chû chu chawhtawlhah emaw in nâute chu hnim piltîr teh u, wawi sarih thleng lo chhiarsak ula, chutah a chanchin hi in hrilh dâwn nia. Hla sak tûr: “Naaman’s Song” (*Little Voices Praise Him*, no. 65).

**Níngānî:** An thiante leh mi dangte hnêna Naamana lem entîr a, chutah tihdam a lo nih dân chanchin hrilh tûrin in fâ chu in fuih phûr dâwn nia. (A nih loh leh, tui atanga Naamana lo chhuak lai lem ziahpui ang che u.)

**Zirtâwpuñî:** In worship-naah Bible thawnthû hi lemchanah hmang ho ang che u. Naamana phâr lem atân thil hnawih vâ in hmang dâwn nia. Hla sak tûr: “Let Us Do Good” (*Little Voices Praise Him*, no. 263). Chutah mi dangte tâna thil thâ tihsak theia min siam avângin Pathian hnênah lâwmthû sawi ang che u. Nî tina mi dangte rawngbâwlsakna tûr kawng A kawhmuahna tûr che uin, Pathian ṭanpuina in dîl dâwn nia.